

30 MAC 2013

## Campak dadah RM2 juta ke laut

Oleh ROSLI HASSAN

rosli.hassan@kosmo.com.my



ABU BAKAR (tengah) menunjukkan bungkus pil yang disyaki dadah ekstasi dibuang di kawasan perairan Melaka semalam.

ALOR GAJAH – Pasukan Maritim Malaysia (APMM) dari Kuala Linggi di sini berjaya mematahkan satu cubaan menyeludup kira-kira 40 kilogram dadah dipercayai ekstasi bernilai hampir RM2 juta di perairan Melaka berhampiran Pulau Upeh awal pagi semalam.

Ketua Penguat Kuasa Maritim Kuala Linggi, Kepten Abu Bakar Idris berkata, dadah tersebut dibawa dengan sebuah bot gentian kaca yang dipercayai menuju ke negara jiran dari negara ini.

Menurutnya, rampasan itu adalah hasil tindakan pantas sepasukan pegawai dan anggota yang sedang melakukan rondaan di perairan Melaka yang mengesan bot berkenaan dalam keadaan mencurigakan pada pukul 6.25 pagi.

“Anggota terbabit kemudian menghampiri bot tersebut sebelum mengarahkannya berhenti namun tidak diendahkan oleh tiga suspek yang berada di dalam bot berkenaan. Mereka sebaliknya melarikan diri dengan memecut bot tersebut.

“Suspek juga bertindak agresif apabila melanggar bahagian belakang kanan bot milik APMM yang digunakan menyebabkan anggota terbabit terpaksa melepaskan 10 das tembakan amaran,” katanya pada sidang akhbar di Kuala Linggi di sini semalam.

Abu Bakar berkata, setelah kira-kira 15 minit mengejar, suspek mencampakkan sebuah beg berwarna hitam ke laut sebelum mencampak lagi beg serupa kira-kira 500 meter dari tempat pertama.

Katanya, anggota APMM kemudian bertindak memberhentikan bot untuk mengambil beg yang dibuang itu dan kesempatan tersebut digunakan suspek untuk melepaskan diri.

“Hasil pemeriksaan pada beg pertama mendapati, ia mengandungi 20 bungkus pil berwarna kuning dipercayai dadah manakala beg kedua mengandungi 26 bungkus pil berwarna merah jambu juga disyaki dadah.

“Jumlah berat kesemua 46 bungkus ini ialah kira-kira 40 kilogram yang bernilai hampir RM2 juta,” katanya.